

# **...?Prouvènço!...**

*Lou bèl an 100en de la Soucieta*



Nouvello tiero : n° 53

Tresen trimèstre de l'an 2005

**- Usage e coustumo dóu Terraire Marsihés -**

...?Prouvènço!... Buletin n° 53 - 100 an aquest an!

# Assouciacioun ...?Prouvènço!... founded en 1905

**18 Carrierre de Beyrouth - 13009 Marsiho  
C.C.P. : 1073.94 X - Marsiho**

Buletin dóu tresen trimèstre de l'annado 2005

Abounamen pèr l'annado : 18,50€

Ensignadou

Cuberto - L'Isclo Maire, rado de Marsiho Tricò Dupuy

- |                                     |                      |
|-------------------------------------|----------------------|
| - Lou mot de la Cabiscolo           | Tricò Dupuy          |
| - Gipassoun                         | Leoun Félix          |
| - Lou miracle dóu dóutour Boutigo   | Louis d'Andecy       |
| - lou pichot Poulbò                 | Eimound Blanchet     |
| - La biblioutèco numerico moundialo | Bernard Giély        |
| - Un jour pas coume lis autre       | Jan Collette         |
| - Lengo sèmpre mespresado           | Louis d'Andecy       |
| - Lou gàubi prouvenaçu              | Leoun Félix          |
| - Zibo-zoubo                        | Gineto Fiore-Florens |
| - Negre coume lou tablèu            | Gibert Mancini       |
| - Zezeto e Bartoumiéu               | Louis d'Andecy       |

## Messo en pajo, beilessu de la publicacioun : Tricò Dupuy

1

## Lou mot de la Cabiscolo

D'un même cop, dous buletin? Aquelo empego! De que se passo? Hou, es li vacanço, coume acò, avès quaurèn de legi pèr un moumenet...

Dins lou Prouvènço d'Aro dóu mes de juilet, lou cap-redatour, Bernat Giély faguè soun editouriau sus lou CIEL d'Oc e sa biblioutèco virtualo.

Vous n'en baian la còpi dins aquest buletin.

s'avès la chabènço d'èstre abouna au maiun, se fasès lou [www.cieldoc.com](http://www.cieldoc.com), arribarés sus la biblioutèco virtualo emé tout un mouloun de libre e de revisto à legi o à telecagraga. Pièi, s'avès envejo, ié troubarés li buletin de ...?Prouvènço!... despièi lou n° 27.

Bono leituro e bono fin d'estiéu

Vosto bèn devoto,

## Tricò

-----

## Gipassoun

Dins moun bèu tèms, au vilage, se pòu dire que li mejan de s'espaça mancavon pas.

D'en proumié li boulo, lou jo prouvençau e la petanco, lou balèti, lou ciné, li voto di vilage e viloto de neste relarg. I'avié pièi Lou Ciéucle de l'Aveni mounte se n'en disié e se n'en fasié tant e pièi mai!

Aro, tout acò a proun chanja, i'a toujour lou Ciéucle, li boulo, li voto, mai aro la televisioun a leva de cassolo li vihado à la marrido sesoun e li tarabastado di jouvènt, après lou soupa, l'estiéu. Aqui dève dire que de moun constat, ère pas lou darnié pèr faire de couiounado. Li coumpan m'escais-noumavon "Lou Boustigaire". I'avié pièi Louis que soun faus-noum èro "Basset" e "Pico-rèsto" lou jougaire de bocho, un farcejaire qu'èro pas de dire. Fau pas oubliada "Jan-de-la-Vaco", que soun paire fasié mestié de lachié, un poulit roudelet...

I'avié tambèn un brave ome de gipié, Agustin, escais-nouma "Gipassoun", d'aqueù tèms èro plus de la proumiero jouinesso, mai coume tiraire d'aufo se tenié un pau aqui, ço que fai que s'acipavo i trufarié de tòuti. E, nàutri, li jouine lou fasien, de cop que i'avié, vira coume baudufo, de soun constat, éu, nous rendié pato pèr aguïo.

Legissié soun journau au Ciéucle en bevènt soun pastis, un cop la journado acabado, que siegue "Basset", "Pico-rèsto", o "Jan-de-la-vaco", o alor voste servitour, mancavian pas de ié bouta fiò...

Noste "Gipassoun" avié pèr mouié uno femo braveto, douço e tout, que se poudié pas dire, e que tout lou mounde au vilage sounavo "Tanto Roso"... Pamens vivournet e escarrabiha, Agustin èro un pichot tapet, pèr elo se poudié dire que i'avié rèn de tant bèu que la graisso soutu la pèu, lis estouma redoun coume de meloun de Cavaioun e lou quiéu coume uno banasto d'óulivarello.

Vaqui qu'un sèr d'estiéu après lou soupa, Agustin avié un brisoun carga la lignoto. Coume erian aqui à ié manda de chameto sus la bagatello dis ome de soun tèms, subran s'aubourè de sa cadiero e nous venguè coum' acò emé soun èr de Miquèu-

## **...?Prouvènço!... Buletin n° 53 - 100 an aquest an!**

l'ardit que i'agradavo tant :

— Tè ! coume siéu decida me vau faire la cabucello à moun toupin!!

Acò toumbè pas au sòu...

A la lèsto, se sian ana faire esquineto pèr se quiha cauto-cauto sus li branco mestresso de la platano, mounte d'aqui poudrian vèire la sceno, dins la chambro à l'estànci... Jan-de-la-Vaco avié adu de soun oustau uno serengo de manescau, cargado d'aigo sabounouso.

La fenèstro de la chambro duberto à brand, avèn rèn perdu de l'espetaclé.

Es elo qu'es arrivado la proumiero emé lou calen que pausè sus la taulo de niue. Avié carga sa raubo de dessouto e li tapadouiro. Eu, pièi a fa soun intrado en camiso de niue. An coumença de se poutouneja e de se cachoula. Nautre se retenien dóu rire.

— Roso? Ié siéu?

— Noun! acò 's pas acò!! ié siés pas, te ié prenes pas bèn, moun ome

— Fau que rintre!

— L'arrivaras pas, Gustin

— Ié siéu aquest cop?

— O! O! Gustin, ié siés, aquest cop!

Fuguè just lou moumen que Jan chausiguè pèr lis aspergi à jabo emé la serengo...

L'afaire faguè un patin-patan dóu diable au vilage. Agustin avié debana si lagnanço à la gendarmarié pèr nous endraia un proucès. Se faguè pièi uno enquèsto e fin-finalo, l'afaire fuguè arresta.

Pamens lou Gipié avié roumpu busqueto emé nautre....

### **Leoun Félix, 1993**

- - -

*Pèr assaja de vous faire risouleja, dins lou parla d'Aigo-Morto:*

### **Lou miracle dóu dóutour Laboufigo**

S'agis d'uno malaujté que li feno riscon pas de l'agudre.

Lis ome, éli, n'i'a foço que se l'aganton quouro se fan viel.

Mon papet fuguè douc óublia de se faire charcuteja la proustato.

Lou medecin de Nime que ié prepausavo de l'óupera, lou dóutour Laboufigo, ié diguè:

— Anas vèire, moun brave, acò vous fara rejoueni qu'es pas de crèire !

L'anestesio se debanè mai que bèn e, après l'óuperacion, moun papet se revihè coume se dèu. Pièi lou recatèron dins sa cambro.

L'endeman, dins la matinado, lou medecin iè venguè faire la vesito.

— Sias lou pu fort, moussu Laboufigo, ié venguè moun grand, m'avias di qu'anave rejoueni mai iéu me pensave que sarié soulamen de quàuquis annado.

— De que voulès dire, moun brave moussu ?

## ...?Prouvènço!... Buletin n° 53 - 100 an aquest an!

- Avès fa, dóutour, un vertadié miracle! Ai rejouveni de mai de setanto an!
- Couiòsti, tant qu'acò? faguè lou cirourgian proun estouna, vaqui quicon de nouvèu. De que vous fai dire uno causo pariero, siéu pas curious mai amariéu de saupre...
- E bèn aquesto niue, s'es passa quicon que m'èro pas arriba desempièi aperaquí setanto an.
- Boutu, vejan un pau. Degas-me eisatamen ço qu'avès ressentí e à quente moumen ?
- Vaqui es de matin, quouro me siéu reviha, ai vist que, dins la niue, avié pissa au lié, coume un enfantoun !

### Louis d'Andecy

---

### Lou pichot Poulbò

La Poulido èro uno vaco de la manado. Un pau timido s'agradavo dins la court dóu mas e venié manja dins lou ferrat la civado que mancavo pas d'ié pourgi tóuti li jour. Or, un bèu matin de printèms, en m'aubourant, la remarcave pas. L'apèu dóu masclè èro esta lou mai fort.

Maugrat mi recerco emé Roumiéu, moun chivau, ges de traço de la Poulido.

Coumprenguère de seguido. Avé degu segui soun calignaire dins un cantoun retira ounteubre-tout pas li cerca.

Car, se tau e chivau vivon ensèn en Camargo, dins un cas parié, lou tau desfènd soun intimita contre tout eventuaus vesitaire, fuguè esta soun coumpagnoun de manado.

Restavo dounc plus qu'a espera. Mai quau èro lou tau qu'avié pouscu faire acò. Après uno quingenado e un coumtage minucious di bèsti, apareiguè qu'èro Boquet qu'avié enlava nostre poulido vaco. L'espèro coumencè. Poulido revenguè dins la manado, groussissènt chasque jour, ço que prouvavo que quauclarèn s'èro passa dins lou parèu. S'aventuravo plus dins la court dóu mas. Cargavo Roumiéu, quouro s'aprouchavo à toucant. Brèu! un coumpourtamen qu'en disié long sus soun estat.

Li courso coumenceron alor dins lis areno e fuguè souvènt deforo de la manado. Quouro un jour, un ràfi venguè me dire :

— Poulido a despareigu. Lou mestre es inquiet. Fau vite veni pèr la retrouba.

Me doutant bèn de ço qu'en retournavo,



## ...?Prouvènço!... Buletin n° 53 - 100 an aquest an!

selavo moun chivau e me meteguè à barrula tòuti lis endré fougous e secrèt mounte la bèsto s'èro escoundudo pèr faire soun pichot.

Après quauqui batudo, tout d'un cop, Roumiéu tanca si pato dins lou sòu e voulié plus avança. Meteguère pèd à terro, moun ficheiroù à la man, e prudentamen avançavo dins un taiadis forço ramu. Poulido èro aqui, alachant soun vedèu e veguère dins sis iue uno lusour d'amiracioun, coume se disié :

— Es pas bèu moun pichot?

Sachènt desenant ounte li trouba, galoupave preveni lou patroun que fuguè tout-plen rasssegura. E coume tenié un cartabèu de si bèsti, me demandave :

— Coume anen apela aquéu nouvèu na ?

— Eh ! bèn patroun , ai uno idéio. Coume m'a pareigu forço delura, car l'ai óusserva, pènse que Poul coume la proumiero silabo de sa maire e Bo coum' aquelo de soun paire, Poulbò coume li pichot galapian de Paris.

— Osco ! richo idèio! Benvengudo à Poulbò dins la manado.

Lou tèms s'escoulavo d'aise, fin qu'un jour Poulido e Poulbò penetreron dins la court dóu mas e reprenguèron sis anciànis abitudo, franc lou pichot qu'avié bèn merita soun noum. Courrié après li galino, li chin e meme li cat, s'amusavo de tout. Fouolo jouinesso!

Mai quaucarèn me tournavo dins la cervello. Coum' avien-ti fa tòuti dous pèr passa à travès la barraduro qu'enviroutavo la manado. En cercant bèn, troubave uno porto qu'èro mau barrado e que mi dous larroun avien emprunta pèr reveni dins la court dóu mas.

Mai acò anavo pas dura loung-tèms. Un jour lou patroun me diguè :

— Va falé l'enmairaia pèr lou desmama pèr-fin que teto plus sa maire.

Tant lèu dit, tant lèu fa.

Poulbò fuguè arnesca d'un espèci de moussèu de bos, em' un anèu dins si narro, qu'en levant la tèsto, se baissavo pèr l'empacha de teta e quau la tèsto èro en bas se durbissié pèr que pousquèsse broustiha.

Sa maire vesènt acò, repartiguè dins la manado em' èu, coume se nous rendié coupable d'aquesto causo.

Fin-finalo quouro fuguè devengu un anouble, lou patroun decidè de faire uno ferrado.

— Deman, i'a uno ferrado, me diguè. Isoularas Poulbò e lou marcaren au ferre e ié faran l'escoussuro de la manado. Es tèms que devengue majour.

L'endeman, davans cinq cènt persouno, lou pichot subissié la lei de tòuti li tau e s'encourpourè definitivamen dintre lis àutri bèsti.

La seguido d'aquel'istòri es que fuguè un grand tau couardié e que rempourtè forço troufèu dins l'arenò. Pièi aguè trouba uno coumpagno à soun agrado faguè coume si parènt.

La vido èro-ti pas un eternau recoumençamen?

**Eimound Blanchet**



## La Biblioutèco numericò moundialo

Sias pas sènsa saupre que, tre l'espelido de l'internet encò nostre, uno chourmo de prouvençau se diguèron que falié sarra l'anguielo e se n'en servi pèr espandi li tresor de nостo lengo dins lou mounde entié, valènt-à-dire nостo literaturo que di troubadour enjusqu'i pouèto e roumansé mouderne d'aro fai mirando. Fuguè la creacioun dóu Cèntre internaciounau de l'escrit en lengo d'oc, lou CIEL d'Oc, l'idèio èro de numerisa tóuti li libre papié redegi dins nостe parla e de li tremuda en libre eleitrouni, d'ùni dison en doucumen dematerialisa.

Pèr acò faire, se poudié foutougrafia li pajo uno à cha uno, e l'oubrage se poudié pièi legi à l'escran en «mode image», tant soulamen lou tèste rèsto aqui caia, se pòu pas manoubra dedins, cerca de mot, vo reprene d'escapouloun.

Adounc es la numerisacioun coumplèto emé la recouneissènço di caratère que se chausiguè pèr faire d'oubrage en mode tèste. D'aquéu biais, lou libre iniciou s'endevèn un fichié pèr l'ordinatour, lou tèste es parié que s'èro esta pica sus lou clavié, se ié pòu naviga dedins, se n'en pòu moudifica la presentacioun, groussi li letro, mai subretout se ié pòu faire de recerco, se voulès saupre ounte Frederi Mistral a emplega lou mot «Marsihò» dins soun obro, pas besoun de tout relegi, l'aplicacioun enfourmatico vous meno dre sus lou mot. Pièi subretout se voulès prene de passage d'uno obro, sufis de faire uno còpi e de l'ana pega ounte voulès, à guiso de citacioun de l'autour. Enfin lis ensignaire de la lengo an d'oubrage aqui, à gratis, pèr travaia sus lou tèste emé sis escoulan.

Fuguè, de-bon, uno escoumesso, lou CNRS de l'Universita de z'Ais, prestè tant lèu soun ajudo, la coumuno de Berro baiè li loucau, lou Ciel d'Oc troubè d'emplega e despièi mai de dès an, tóuti li jour de doucumen escri dins nосте parla soun numerisa, entira de soun papié pèr pousqué resquiha sus la telaragno de l'internet.



## **...?Prouvènço!... Buletin n° 53 - 100 an aquest an!**

Sabian que la Biblioutèco Naciounalo sarié pas en rèsto e anounciavo soutu la bandiero de “Gallica” un prougramo de numerisacioun de sis oubrage. Tant soulamen, èro tout vist qu’anavon pas se soucita en proumié di libre escri dins uno autre lengo que lou francés, la lengo óuficialo de la Republico. Pièi mai, sa numerisacioun èro bastardo, fan rèn que de reproducioen en mode image, aquelo teinico es pas mai qu’uno estirado dòu vièi proucedat dòu microfilme. Se pòu legi lou tèste de la pajo se la fotò es bono. Es deja acò, l’interès es de pas agué besoun de se desplaça dins uno biblioutèco pèr consulta l’oubrage. Gallica a tambèn rabaia quauqui libre e revisto toucant nosto lengo, aperaquí un cinquantenu sus li 80.000 libre que prepauso à l’escran.

Lou CIEL d’Oc a realisa éu à l’ouro d’aro 688 libre e 268 revisto, mai en mode tèste jogant coume se dis sus la qualita, e festejara bèn-lèu soun proumié milié de doucumen. Vaqui la toco dòu CIEL d’Oc a capita : espandi la lengo dins lou mounde entié, e subretout la pourta sus lou platèu de l’escran dins lis oustau sènsò óubliga li gènt à se desplaça. L’acès à la couneissènço d’oubrage rare sara plus un privilège pèr inteleituau furnaire vo couleiciounaire argenta.

Pamens, vuei, lou CIEL d’Oc coume Gallica riscon d’èstre nega pèr la gigantesco óuperacioun de numerisacioun de tóuti li doucumen d’archieu dòu mounde entamenado pèr lou mai grand moutur de recerco de l’internet, la soucieta americano Google.

Google prevèi de revira sus support enfourmati 15 milioun d’oubrage en siès an, aperaquí 4,5 miliard de pajo. An de machinasso capabلو de vira e d’escanerisa 600 à 1200 pajo à l’ouro. Li baile de la soucieta Google, Sergey Brin e Larry Page an fa saupre que voulien metre à la dispousicioun di legèire tóuti li richesso dòu mounde. Pèr que pas, es uno toco lausablo se la lengo prouvençalo es pas óublidado.

Mai, pèr aro, la biblioutèco virtualo dòu CIEL d’Oc es en avanço sus éli, emai aguessian pas li 170 milioun d’eurò de Google pèr faire avans.

Lou gigant american que s’aligno sus lou CIEL d’Oc pèr faire la publicacioun en «mode tèste» vèn pamens de s’embrounça sus la recouneissènço di caratère. S’avison que se la pajo es un pau embrutido, marcado d’un ple vo d’uno petoulo de mousco , li bèlli machinasso fan de cagado. Fau uno releituro emé un courreitour, es ço que fan bountousamen li sòci dòu CIEL d’Oc pèr nosto lengo.

Pèr Google vai ié doubla lou pres de soun óuperacioun, pecaire...

Viro que viraras uno pajo se tourno.

Li vièii biblioutèco d’Europo cridon deja à la mounoupoulisacioun americano, la Franço bramo sous exception culturelle e li baile dòu negòci ié veson qu’un afaire de sòu à la Bill Gates.

Nous autre sian segur de pas rèn vèire veni s’esperan Google pèr numerisa lis obro de Roumanille.

Sènsò coumta que de proujèt councurrènt à l’óuperacioun de Google soun en camin is Indo e en Chino qu’an deja manda en ligno 50.000 oubrage e s’endraion vers lou milioun. Adounc pèr garda li pèd sus terro, bèn tanca dins noste païs s’acountentaren encaro longtemps de la Biblioutèco virtualo de noste CIEL d’Oc.

**Bernat Giély**

## Un jour pas coume lis autre

La marqueso de Brantés se revihè engrepesido de fre dins la chambro pèr coucha de soun castèu de Pont-de-Sorgo. Dóu fiò dins, la chaminèio, restavo plus qu'un moulouinet de cèndre gris, picouta à moumen d'uno brèvo belugo rougejanto. Pèr abitudo, la marqueso poussè soun bras vers l'autre coustat dóu lié emé la sensacioun de l'enfounça dins un tinèu d'aigo glacado; la plaço èro vuèjo. Lèu, lou raduguè contro soun cors tout recrouquiha souto un amoulounamen de cuberto, bèn decidado à perlounga sa som encaro un pauquet. Aquelo tentativo fuguè de pau duro, que Dóufino intrè dins la chambro pèr coucha, sènsa pica à la porto; tenié un platèu que pausè sobre un guerindoun davans de durbi li ridèu tarabin-taraban, permetènt au soulèu déjà aut, d'asounda lou mèmbre de si rai.

— Hé, noun, Fino! Acò me fai parpeleja. Rebarro li ridèu.

— Zóu, Agato! te fau reviha! Sian dimenche. Lou curat t'espèro e te rapelle que vuei, reçaup soun Eminènci et qu'es tu que bao lis óufrèndo.

— Fino, siés qu'uno vièio sartan sènsa cor. Un jour, de-segur, te quicharai lou galet.

— Es bèn acò qu'auriéu degu de faire emé tu, quouro me mourdiés li pouseto en tetant.



E lou dialogue quoutidian se perseguiquè entre la marqueso e sa maire de la, enjusqu'au moumen ounte aquesto, l'estimè proun revihado pèr ié servi uno tasso de la e un bescue.

— Sabes que toun ome a encaro descoucha?

— Escouto, Fino! Me sèmbla qu'aqui, dins aquéu lié, siéu la miés en plaço pèr me n'en rèndre comte tutto souleto.

## ...?Prouvènço!... Buletin n° 53 - 100 an aquest an!

— E acètes acò? Pèr iéu, crese que, se moun ome m'avié fa la memo causo, te proumete que l'auriéu cresta pèr i'aprene à pas recoumença.  
— Ha! Ha! T'imagine, ma bello, partejant ti niue em' un capoun.  
— Empacho pas que toun marqué a encaro fa trauquet dins la granjo em' aquéu signor Scanegiti!  
— Sufis, Fino! N'i'a proun coume acò! Ame miés lou saupre touto la niue em' aquéu signor qu'es un sabentas e, de mai, un tras que bel ome.. qu'emé uno bourdeliero d'Avignoun.

Peraqui la memo ouro, dins un oustau proche de Saint-Agricòu, l'abat Nardi se revihavo tambèn, vo pulèu acabavo sa niue, de forçò marrido imour. La vèio, avié degu assista à l'acamp soulenne dóu chapitre, presida pèr l'archevesque éu-meme, segui, pèr desfourtuno, d'uno grand messo que s'ero acabado que forçò tard, à l'ouro mounte li bon crestian dison li graci. La durado anourmalo d'aquelo courrado l'avié priva d'un dina de requist emé lou comte Felician de Baroncelli-Javon, ome de qualita que savié apoundre à la delicatezzo de la manjiho, l'agradènço de la cunversacioun, un brisounet gratihouso, de l'autour de nouembròusi coumèdi lóugiero e de foulie-vaudevilo jogado enjusqu'à la Court, à Versaio.

Avié l'estouma vuejo, vo quasimen, quouro s'ero quiha sobre sa vièio cavalo, Dido, pèr ana rèndre vesite au curat de Mount-Favet que pretendié agué enventa uno eisino pèr empacha li cat de miaula de niue. Fai bon de saupre que l'abat Nardi, en mai de sis óubligacioun religiouso, eisercissié li founcioun de Secretari de l'Assouciacioun Filantroupico d'Avignoun pèr lou Desvouloupamen de la Sciènci, e que ié revenié lou siuen d'estudia e de faire un rapport sobre tóuti lis envencioun de l'encountrado. Après agué escouta lis esclargimen de soun counfraire em' uno graveta qu'escoundié mau uno toutalo indiferènci, s'eron pamens entaula dóu tèms de Dido s'emboucavo, d'erbo nouvello dins uno pradeto procho.



La soupo de cese e l'anchoiado avien precedi la brouiado enrabbado, uno broufado, de caieto de fege e un civié de lapin, acoumpagna de mant uno boutiho de vin rouge e blanc, e lou soupa s'ero acaba em' un compoustié de confituro e quàuquis auriheto bèn messo en valour pèr un Baumo-de-Veniso de la bono.

Mau-grat Dido que poussedavo un sèn inna de l'óurientacioun, la revengudo vers Avignoun èro estado di mai perihouso pèr l'abat Nardi e la niue forçò dificilo pèr l'encauso de mau de vèntre qu'ero incapable de n'en trouba l'óurigino e que deguno vessinado salutouso èro vengudo soulaja. Peniblamen, se derrabè de soun lié e tout en se massant lou vèntre, anè vers la fenèstro, n'en durbiguè li contro-vènt e pousquè pas reteni

## ...?Prouvènço!... Buletin n° 53 - 100 an aquest an!

uno esclamacioun d'amarun:

— Sarnipadiéu! E, encaro mai, fai bèu!

La matinado èro bello. Lou franc soulèu rebajavo de coulour à la campagno encaro caiado dins sa raubo d'ivèr, un mistralet atremoulissié li cambo di cano e li branco despuiado dis aubre e, dins lou liuen, vers la Duranço, de renguero de piboulo s'aubouravon vers lou cèu coume d'escoubo gigantesco lèsto à neteja aquéu di darriéri nivoulino de la niue. Quàuqui tueis, de bousquihoun de pin, uno fiero d'auciprè e quàuqui baragno esgaiavon d'un pauquet de verdureto un païsage fa de gris, d'ocre e de brun.

Un ome, que ié disien Vidau, venié de faire uno pauso en dejunant d'un crouchoun de pan acoumpagna d'un tros de ventresco, beguè uno darriero goulado au sourgènt e reprenguè soun camin. Parti lèu dóu mas de si gènt à Cabano, anavo depausa uno óufrèndo à la capello de Sant Ro pèr sa maire que voulié gramacia lou sant d'agué fa espargna sa famiho au tèms de la daniero epidemio de la pèsto. En fa, avié aceta voulountié d'ana à-n-Ourgoun, que voulié poussa jusqu'à La Pardigalo pèr ana vèire uno vièio femo qu'avié lou doun e qu'èro soun darrié espèr.

Desempièi mai d'uno annado, Vidau avié avouda soun amour à Estefaneto, la fiho dóu mas de la Galifeto, vesin de lou de si gènt. Li famiho èron d'accord pèr lis acourdaio mai Faneto pervenié pas à se decida; èro gènto e riserello, se leissavo boustiga un brisounet, mai refusè de se leissa prèndre mai qu'un poutoune sabre sa gautouno. Sènso èstre de naturo especialamen fougouso, Vidau n'en avié soun proun de faire lou pèd-d'enders. Amavo profoundamen Faneto e, coume sentié bèn que i'èro pas indiferènt, s'èro despatouia pèr ié rauba un tros de riban emé quau esperavo que la masco pourrié faire un charme, que vinceríe si reticènci e la jitarié de-bon dins si bras.

En meme tèms que la marqueso se resouvié à quita soun lié caudinèu, à quàuqui pas d'eila, dins uno granjo, tres ome jasien, endourmi à broco-quiéu, sabre de boto de pajo, au mitan d'un cafarnaoun d'aparèi bijarre, d'engèn tubulàri e de machino enigmatico pausado sabre un sòu jounca de bourdiho e de retajoun de ferre, de bos, de papié, de cuer e de cordo. Eron rebutant de saleta dins si vèsti de vilo tout enfangousi; sa capeladuro èro clafido de pousso e de brèu de paio e sabre soun carage, la susour avié traça de coulado blancasso. Un rai de soulèu esquihant entre li parpello d'un di dourmèire, lou sourtiguè brutalamen de sa som. Après un moumen de chancello, bramè subran à l'entencioun dóu segound dourmèire:

— La Poudro!!! Reviho-te!

Ço qu'aguè pèr efèt secoundàri de tira, tout sute, le tresen dourmèire de sa som.

— La Poudro, lèu-lèu, mando lou proumié pijoun en Avignon. Dóu meme tèms, dis à la cousino de nous pourta lou dejuna.



## ...?Prouvènço!... Buletin n° 53 - 100 an aquest an!

E dóu tèms que La Poudro, ancian sarjant-artificié dóu Reiau Lengadò, se rounsavó vers lis atenànci dóu castèu, lou tresen dourmèire, tout en desplegant soun inmènso carcasso, rejougnè à la porto de la granjo, lou marqués qu'eisaminavo lou cèu.

- Coume avès dourmi, car signor Scanegiti?
- Madre mio! Molto bene, Marqués! E crese qu'ai fa lou plus bellissimo di pantai!
- Que devendra belèu realita ... se Diéu lou vòu e se nòsti plan soun bon.

Assetado davans sa couifuso ounte Fino acabavo de la para, la marqueso veguè passa, davans la fenèstro dóu fougadou, lou pijoun qu'empourtavo lou message vers Avignoun e, pensativo, criguè:

- Veses, Fino, pènse que vuei sara lou grand jour.

Pèr mena paisse soun avé, Faneto devié passa davans lou mas di gènt de Vidau que sa sorre Pelagòi ajudavo sa maire à la bugadasso de fin d'ivèr:

- Ho! Pelagòi! Coume vas?
- Coume veses; degoutejanto de susour. Voles de vèire moun fraire? Faneto sentiguè ié mounta lis arcaneto.
- Respoundeguè, un pau trop lèu, eto:
- Vidau? Noun! Perdequé? L'ai vist aièr quouro es vengu radurre lou doublí au mas.
- Tè! Es verai! Sas, disieu acò, istòri de charra un pauquet. Pèr-ço-que s'aviés vougu lou vèire, moun fraire, t'auriéu di qu'èro ana à-n-Ourgoun e que rintrara de-sèr.
- Ha, bon! Alor, coume mene mi bèsti vers Sant-Sauvaire, belèu que lou veirai sus lou camin dóu retour! Adessias!

L'abat Nardi calavo pas de vessina de coulèro. Avié reçaupu lou message dóu marqués e bèn qu'ague deguno envejo de sourti, sa founcioun de secretari ié fasié uno óubligacioun d'ana coustata l'evenimen de visu pèr n'en faire un rendu-comte à la Soucieta Filantroupcico. Mau-grat li gargoui sounore e li ramado que lou fasien marcha double e sèns espera lou segound message, avié manda soun varlet bouta sellò à sa cavalo. Jasié ablasiga, sobre sa cadiero traucado, quouro lou varlet rintrè coume un foulet dins lou gabinet, tout esmóugu.

— Dido! Dido! Pòu plus marcha! A-n-aganta uno fourburo!

— Segnour! Segnour! Sabe pas s'es pèr l'encauso de la brouiado vo di caieto, mai sias en trin de m'amenistra uno sacro penitènci

Assetà sobre lou lindau de la granjo, lou marqués e lou signor se restauravon de poulet fre, de froumage e de bachiquello diverso de mendre impourtanço arrousa d'un pichot blanc de l'Isclo de l'Oiselè, tout en survihant la manobro delicato que se debanavo davans éli. Souto lou mestrige saganous de La Poudro que, sènso decessa de manja, avié retrouba pèr l'óucasioun la puissanço voucalo e lou voucabulàri di soudard, uno bono dougeno de païsan dóu doumaine ajudavon douz biòu à sourd de la granjo un



## ...?Prouvènço!... Buletin n° 53 - 100 an aquest an!

enorme eschafaudage mounte èro suspendu lou mai gros baloun qu'agon jamai vist.

L'aeroustat èro empreissionnant emé soun diamètre de 42 pèd (mai de 13 mètre); soun envelopo regissènto èro facho de maiun de fiéu recurbi de mai que d'uno espessour de papié divers; pièi èro esta peint e decoura e l'avien escri aquéu quatrin.

*Le Génie est du Ciel le don le plus parfait  
Montgolfier, qui l'obtint, maître de l'Empyrée,  
M'entraîne sur ses pas à la voûte éthérée,  
Et je rapporte aux Dieux le tribut du bienfait.*

Souto lou baloun, èro acroucado uno pichoto nacello, mai sufisentamen grando pèr counteni un passagié en mai de tout uno coumbinesoun de fournèu pourtatiéu e de làmpí abra à-de-rèng pèr un sistèmo plen d'engivano.

Lou counvoi s'arrestè au mitan dóu grand prat. Dóu tèms que le signor Scanegiti proucedissié i darriéris averacioun, lou marqués s'en anè pèr metre d'àbi propre après agué ourdouna:  
— La Poudro, mando lou segound pijoun.

Vidau èro pas gaire fierous, en arribant d'avans l'oustau de la masco. Mau-grat uno pichoto preguiero adreissado de dessoutoun à Sant-Ro en coumplissènt lou vot de sa maire, se sentié bèn soulet e se preparavo à revira camin quouro la porto se durbiguè round e que, sèns muta ni faire un risoulet, uno vièio, salo e espeandrado, lou counvidè à intra dins lou tòdi. Sèns ciha, decessè pas de lou targa un long moumen. Vidau, incapable d'affrounta aquéu regard sèns ges d'espressioun, sentié si cambo ié faire chi e, mau-grat éu, si maisso se metegueron à tremoula.

— Tu, lou sabe, es vengu aqui pèr qu'encante toun amigo. Coume ié disien?

— Estefaneto.

— Pèr l'enmascage, ié dirai Radzugueto e déurias garda aquéu nom dins toun cor pèr la vido.

— Vous lou proumete, pervenguè à barboutina, apoundènt: vous ai apourta lou denié dóu diable, e tendeguè quàuqui peceto que la vièio empouchè sèns meme li regarda, mai en prenènt bèn siuen de li coumta dóu bout di det.

— As quaucarèn qu'ague touca la pèu de Radzugueto?

Vidau sourtiguè de soun sa lou moussèu de riban.

— Rèn qu'acò! Es pas gaire. Sabe pas se vau reüssi. Enfin, coume as lou biais d'un brave drôle, vau assaja, mai faudra que me dounes quaucarèn de mai? As adu li tres erbo?

Ié tendeguè uno pousso nouvello de canisso di bord de la Duranço, uno fueio d'amelié culido



## ...?Prouvènço!... Buletin n° 53 - 100 an aquest an!

dins li rouino roumano de Verneque e uno branqueto de bouis de Sant-Grabié. La vièio li pipè en prounouciant de mot que Vidau coumprenié pas, pièi li masteguè long-tèms davans de lis escipi sobre lou riban qu'envertoulè pèr l'empourta dins lou mèmbe d'à coustat, leissant Vidau soulet e desempara. Aquéu coumençavo de regreta sa demarcho, d'autant mai que ié pervenien de brut estrange: mobile desplaça, cop douna contro li paret, dinda de sounaio, cacalejage e miaulado acoumpagna de gème e d'ourlado inuman. E, tout à-n-un cop, après un brut de tron, la masco pereiguè tourna-mai, la caro blanco coume la mort e lis lue mié barra. Après agué fa emé si man salo un mouloun de simagrèio e de maniganço autour dóu carage de Vidau, ié rendeguè, sèns uno paraulo, lou riban miraculousamen se e inmacula.

— Lou gardaras toujour sobre tu, dins ta taiolo e, quouro veiras toun amado, te diras: — Siés à ieu, Radzugueto. E t'apartendra autant que lou voudras.

Sènso n'en escouta mai Vidau repartiguè à la lèsto tout en repetant la fourmulo magico. Tre qu'aguè vira au recouide dóu camin, la masco eissuguè la croio que se n'en avié cubert la caro e anè recata li peceto dins un vièi toupin escoundu darrié lis esclapo.

La marqueso èro abihado pèr ana à la messo. Metié si gant dóu tèms que Fino ajustavo, emé precaucioun pèr pas estrassa l'ourdounanço de la couifaduro, lou capouchdun d'un ample mantèu, bèn coumodo pèr resista à la frejuro de la glèiso, quouro lou marqués intrè dins lou fougnadou. En le vesènt vesti d'un àbi de ceremounié, debas de sedo, gravato e jabot de dentello, perruco poudrado soutu, un elegant tricorno, la marqueso coumprenguè subran lou moutièu d'aqueù grand aparat.

— Carle! Anés pas mounta emé vosito machino?

— Si, bèn, Agato! N'en ai veramen l'entenciou.

— Carle! M'avias proumés de voula vous-même qu'après agué fa un essai em' un moutoun vo un vedèu. Avès óublida voste engajamen? Aurié jamai cresegu qu'un jour pousquessias manca à vosto paraulo!

— Ai rèn óublida, Agato, mai aquelo proumessò, vous l'ai facho l'an darré...

— Dequé i'a-ti de nouvèu, vue!?

— l'a que Moussu Pilâtre du Rozier a fa, aquest ivèr, un vouiage en baloun de mai d'uno miejo lègo au-dessus de Paris.

— E alor? Sian pas à Paris?

— Noun, sian à Pont-de-Sorgo. Mai sara pas di qu'un gentilome prouvènçau sarié pas capable d'uno valentié identico e, se Diéu lou vòu, superiouro à la d'un Parisen, même nàtiéu de Lourenço!

— Alor s'aqueù Pilâtre avié cavauca uno saussisso gounflo, sarias esta capable de vous atala à-n-un vòu d'auco fèr pèr faire encaro miés qu'éu?

— La coulèro vous avuglo, caro, sias en trin de vous desavia.

— Fague lou Cèu que vous arribe pas la memo causo emé vosto machino!

— Madamo! Anas èstre tardiero à la messo. Lou curat... e mounsegne l'archevesque... lis óufrèndo...

— Fino, m'enfetes. Prene moun óumouiniero e douno-en lou countengut au curat...

— Mai dequé vau-ti ié dire, ieu?

— Ço que voudras! Que que siegue! Que siéu malauteto e s'acò sufis pas, que siéu mourtinouso ... que siéu morto! Pèr quant à vous, Moussu, se persistas à voulé mounta

## ...?Prouvènço!... Buletin n° 53 - 100 an aquest an!

dins voste panié estouradou, vous prevene qu'à voste retour, sarai partido, emé nosto fiho, dins uno retirado seguro mounte vous sara pas poussible de nous recoubra.

— Amariéu de counèisse aquéu liò ... inespugnable?

— Encò di mourgo de Remiremount, que ma rèire-tanto n'en es l'abadesso. Ause espera, Moussu, qu'aurés pas l'audaci de moubilisa un regimen pèr prèndre d'assaut un couvènt.

E davans lou marqués, estabousi pèr la vioulènci d'aquel acès imprevist de coulèro, ague agu lou tèms de se reprene, la porto dóu fognadou se rebarrè tarabin-taraban darrié la marqueso que perseguissé, à travèrs tóuti li salo dóu castèu, uno courso pountuado de clacamen de porto e dóu brut de cadiero e de fautuei jita vióulentamen pèr sóu.

Lou soulèu de miejour, déjà caud à la debuto d'aqueu printèms, rendié supourtable lou mistrau, leva desempièi l'aubo, qu'aro boufavo emé la vioulènci d'un biòu verinous. L'abat Nardi se repausavo de la man de dela là Duranço, à la sousto d'un jas en rouino. A si mau de vèntru, avien sucedi de doulour vioulènto dins lou bas de l'esquino; sa mounturo de manlèu èro uno vièlo miolo un pau goio que, à cado piado, proujitavo en l'èr soun cavalié que poudié que retoumba sèns douçour sus uno sello foro d'usage. E, à la longo, li partiò poupudo an bèn dóu mau à resista à n-un-tau tratamen.

Adounc, l'abat Nardi esperavo, sènso vano despaciènci, l'aeroustat qu'avié degu s'envoula à miejour. Demié tóuti li posto d'óusservacioun desparti entre li sòci de la Soucieta Filantroupico, avié chausi lou mai aliuенcha, soulevant l'amiracioun mudo de si coulègo pèr soun secretàri, mai persounalamen bèn counvincu de l'inutileta de sa messioun, en despié dóu pijoun qu'avié enmena em' éu dins uno pichoto gàbi. Se leissavo dounc gagna pèr un dous dourmihun, pantaint davans aquéu païsage pasible mounte mancavo même pas un avé mena pèr uno bergiero avenènto ... pèr autant que poudié n'en juja de tant liuen.



L'aeroustat s'èro bèn envoula à miejour, vo quasimen. Alor que lou signor Scanegiti countourroulavo un darré cop lou sistèmo d'alumage e que La Poudro fasié metre li païsan, emé de cordo, en round autour dóu baloun, lou marqués dins soun vèsti de ceremounié, coumençavo d'escambarla la paret de la nacello. Es alor que se prouduguè un evenimen que semblavo pas de crèire. La lourdo berlino de viage, i porto blasounado dis armo famihalo, tirado pèr quatre roubùsti chivau, venguè se renja davans lou peiroun dóu castèu. un coufras èro estaca à l'arrié dóu véhicule. La marqueso, envouloupado dins un grand mantèu e la caro escoundudo pèr uno velo de mousselino, pareiguè dins l'embrasamen de la grando porto; dounavo la man à sa fiho, vestido elo tambèn pèr lou viage e tóuti dos se tenien inmóubilo e mudo, dins un silènci treboula soulamen pèr li rounçado dóu mistrau e l'endi di chivau.

## ...?Prouvènço!... Buletin n° 53 - 100 an aquest an!

Davans aquelo aparicioun, tóuti lis assistant se virèron vers lou castèu. Lou marqués, estouna, s'arrouquiguè un long tèms, un pèd pèr sóu e l'autre dins la nacello. La marqueso e sa fiho coumencèron à davala em' uno digneta princiero, lis escaloun dóu peiroun pèr se diregi vers la berlino e, fuguè soulamen quouro n'en ajougneguèron la porto que lou marqués se decidè, de rière-cor, à retira lentamen sa cambo de la nacello. La marqueso ourdounè alor au couchié de ramena la berlino is estable pièi, sèns se vira, forçò drecho, rintrè dins lou castèu emé la memo lentour soulenno, pèr bèn marca sa vitòri. Lou marqués, vincu, faguè alor lou signe de faire s'envoula, sèns éu, lou baloun.

Aquéu, aro, èro en trin de vouga vers lou miejour, buta pèr lou mistrau que boufavo, d'après, lou signor Scanegiti à vint lègo (80 km) à l'ouro

Quouro Vidau, sobre lou camin dóu retour, veguè au liuen, Faneto courre vers éu, seguido de tout soun troupeu, sachè que l'encantamen de la masco avié fa soun efèt. A soun tour, se bandiguè dins sa direicioun. Faneto sentié plus li caiau dóu camin souto si pèd descaus e idau avié óublida la fatigo de sa bono escourregudo.

S'acoursavon avans e, quouro se retroubèron e se rounseron dins li bras l'un de l'autre, desalena, inounda de susour e la caro negadisso de plour, ié semblè tout-à-cop que soun cor anavo espeta. Quouro sentiguè lou dous pitre de Faneto s'escracha contro lou siéu, Vidau restè coume frapa pèr la foudre. Quand Faneto se retroubè inmóobilisado pèr dous bras roubuste que l'enlaçavon, sachè qu'avié descubert lou bonur e, coumprenènt subran coume èro estado bedigasso de retard, pèr galantarié, aquéu moumen meravihous, fuguè elo que, arderousamen, i'accordè lou proumié poutoun sagelant soun amour.

Au printèms, l'erbo, es tèndro, li taiado aculissènto e li móutoun podon se garda soulet. Coume un poutoun n'en apello un autre, aquéu encaro un autre, pièi forçò d'autre, veguèron plus rèn que sis iue e n'ausiguèron plus rèn d'autre que lou batemen de si dous cor.

Uno pressentido eslucianto traversè la som de l'abat Nardi. Avans de se reviha, sachè que çò qu'avié refusa d'envisaja, anavo se proudurre. Sa proumiero vesioun, à travès si parpello, peniblement entre-duberto, fuguè lou baloun que perdié douçamen de l'autour à uno lègo (4 km enviroun) d'aqui. Se redreissè, autant lèu que ié permetien sa graisso e sis amalugaduro, pèr descurbi que sa monturo èro en trin de se repaisse de jòuini poussò de blad dins un champ vesin. Assajè de l'aganta, mai refusavo de se leissa aproucha. Gardant un uei sobre lou baloun, countuniè sa cours après la miolo au caractère countradous que semblavo prèndre plesi à-n-aquelo coursejado jusqu'au moumen, ounte alassado, après dos ouro, d'aqueu jo, se leissè pasiblament aganta. Quouro l'abat Nardi pervenguè à se metre en sello, lou baloun avié despareigu, mai avié pouscu remarca l'endré aprouchadis de sa toumbado.

Faneto e Vidau avien bèn cresegu à la fin dóu mounde quouro uno ouembrasso negro èro vengudo derroumpre soun dous tèsto-à-tèsto e qu'un pau mai tard, avien ausi un gros brut de branco esclapado segui d'un profound silènci. Faneto pancaro remesso de sis esmóududo de davans, se traiguè tourna-mai dins li bras de Vidau que, tout en proufichant de l'aubeno, coumençavo de pensa que la masco n'en fasié un pau trop. E quouro, precedi dóu tac-à-tac d'un trot bancau que s'aprouchavo d'à cha pau, veguèron


## ...?Prouvènço!... Buletin n° 53 - 100 an aquest an!

pouncheja de la ramiero, un gros demòni negre quiha sobre uno bestiasso griso i labro regaussado que pareissié de trufa l'éli, Faneto, au coumoulun de l'esglàri, sènsò meme prendre lou tèms de se repimpa, s'enfugiguè coume uno folo, perseguido pèr Vidau que la sounavo pèr la rassegura.

Countuniant si recerco, l'abat Nardi tardè gaire à retrouba lou brisun de l'aeroustat.

Segound la prouceduro messo en plaço, noutè sougnousamen, sobre un bendoulet que fissè à la pato dóu pijoun, lou liò de l'atterrage ansin que l'ouro eisato (5 ouro 48) que, venié de legi sobre lou cadran de sa cebo. Lou pijoun s'envoulè lèu-lèu vers Pont-de-Sorgo mau-grat lou mistrau que redoublavo de vioulènci.

Forço mai tard, dóu tèms que la marqueso, recounciliado emé lou marqués, avié plus li pèd gela, que l'abat Nardi jouissié de la glòri d'èro esta lou troubaire dóu baloun, que, souleto dins sa chambro, Faneto revivié lis esmóugudo d'un bonur, nouvelamen revela e que Vidau vesié veni lou coumplimen de sis esperanço, lou signor Scanegiti, à sa taulo de travai, decessavo pas de faire e tourna-faire si calcul, pervenènt pas à coumprendre coume, em' un vènt de 20 lègo, lou baloun avié mes mai de 5 ouro pèr percoula un pau mens de 6 lègo.



Lis evenimen d'aquelo jounado, pas coume lis autre, se debanèron lou 4 d'abriéu de 1784, entre Pont-de-Sorgo e Ourgoun.

**Jan Collette**

Printèms de 1999

— — —

## Lengo sèmpre mespresado

La lengo franceso, souleto lengo recouneigudo coume lengo de la Republico de Franço, adóuto de-longo de mot nouvèu que vènon tòuti d'àutri païs.

La lengo óuficialo es pas proun richo, proubable, bord que lis estajan de l'eisagone an besoun d'ana pesca dins lou voucabulàri di lengo que se parlon foro nòsti frontiero. Mai belèu qu'acò marco bèn de charra coume lis estrangie!

La lengo naciounalo es toujour que mai clafido, dirai meme empourcassido de mot qu'an rèn de vèire emé neste païs. Pamens, se voulèn endrudi neste parla de Franço, lou meiour biais sarié-ti pas de prene de voucable d'uno autre, grando lengo dóu païs, la lengo d'O, pèr eisemple?

Mai quau aurié l'idèio de lou faire? Li saberu de l'Acadèmi franceso? Acò risco pas! La

## ...?Prouvènço!... Buletin n° 53 - 100 an aquest an!

maje part di gènt, lou fau bèn dire, e memo dins lou Miejour, an vergouchno de la lengo nostro, que Mistral noumavo emé resoun, lengo mespresado.

Pamens es di mai chanudo, em' uno literaturo de trío, d'escrivan e de pouèto qu'an autant de gàubi e de talènt coume li qu'escrivon en francés. Es uno lengo richo d'uno tras que grando diversita dialeitalo ço que i'empacho pas d'agué, uno gramatico e uno ourtougràfi que soun de respeta coume pèr tòuti lis àutri lengo dóu mounde.

I'aura toujour de gènt pèr dire qu'es uno mescladisso, d'estrasso, un foufou de marrit patoues, tout just bon pèr un païsan sènsò culturo. Qu'encha? I'a que li nèsci que podon crèire de bestige parié.

Fau pas óublida lou raiounamen espetaclous qu'aguè la lengo di troubadour. A l'Age Mejan, la lengo d'O avié ennegà l'Éuropo tutto. Fin finalo aquelo lengo que d'ùni que i'a la voudrien rabeissa au rèng de vulgàri patoues, es mai qu'uno lengo naciounalo; es, se pòu dire, uno lengo éeuropenco. Es de nouta que la lengo d'O es ameso óuficialamen pèr lou gouvèr italian dins li Valado dóu Piemount ounte la lengo nostro s'es mantengudo, parié en Espagno dins lou Vau d'Aran. En Franço, pecaire de nous autre, ié sian pancaro!

La Suedo, vaqui encaro un païs que mespresso pas la lengo: an decerni lou prèmi Nobel de literaturo au Mèstre de Maiano.

Ana querre de voucabulàri en païs estrangié coume se fai, es vertadieramen dessena, es uno escorno di mai grando pèr la lengo nostro, lengo mespresado un cop de mai!

Perqué agué adóuta de mot de la lengo arabe :

- guitouso que se pòu dire tibanèu
- maboul que se pòu d'ire bau o nèsci
- haschich que se pòu dire canebe d'Indo
- l'espressioun c'est kif-kif que se pòu dire acò 's parié

Perqué prene de mot d'aleman:

- l'ersatz que se dis encò nostre pervalènt
- le kirsch que se dis encà nostre l'aigo-ardènt de cerieso
- le blockaus que se dis encà nostre lou fourtin
- un krach que se dis encò nostre uno desbrando

Pièi i'a li mot d'anglés, à l'ouro d'aro lou voucabulàri óuficiau n'es clafi:

- fifty-fifty pèr dire mita-mita
- spleen pèr dire malancounié
- le fast-food pèr dire lou manjo-lèu
- le boss pèr dire lou pelot
- un speech pèr dire uno dicho
- le dancing pèr dire la salo de balèti
- une star pèr dire uno estello
- un self-service pèr dire un lou fas-soulet
- le strip-tease pèr dire lou levo-tout

N'en poudriéu dire ansin jusqu'à deman.

Ai-las!, Frederi Mistral, ome d'engèni e sauvaire de la lengo, fuguè pas segui coume se l'amaritavo.

## ...?Prouvènço!... Buletin n° 53 - 100 an aquest an!

*Ah, se me sabien entendre!  
Ah, se me voulien segui!*

O, es malurousamen clar: la lengo es encaro e toujour mespresado. À la debuto, de Mirèio lou mestre de Maiano escrivé:

*Emai soun front noun lusiguèsse  
Que de jouinesso, emai n'aguèsse  
Ni diadèmo d'or ni mantèu de Damas  
Vole qu'en glòri fugue aussado  
Coume uno rèino, e caressado  
Pèr nosto lengo mespresado*

Cresès pas que fau èstre injuste e dessena pèr countunia de desdegna e mespresa uno lengo tant requisto? Quanto vergougnó!

**Louis d'Andecy**

- - -

## **Lou gàubi prouvençau**

Un jour d'estiéu, dins lis annado sieissanto, avian decida emé ma mouié d'ana vesita Aigo-Morto.

Cadun saup qu'aquelo vilò fuguè rebastido e espandido pèr Sant-Louvis au siècle tregen; faguè tambèn cava lou port pèr fin finalo s'embarca pèr la Crousado. L'encencho fuguè bastido pèr Felip l'Ardit que soun toumbèu se trobo dins la Catedralo de Narbouno.

Aquelo permenado fuguè lèu decidado, bord que fasié un tèms d'or em' un ventoulet de largado. E pièi fau dire que venian de croumpa nosto proumiero veituro, alor à dire lou verai, avian proun envejo de vèire de païs. Lou tèms d'ana querre à soun oustau, ma maire e sa feleno de vuech an, e nous vaqui sus la routo de la Camargo. Li femo èron estigançado de raubo d'estiéu, iéu, fasié lou cafinot em' uno casqueto e uno camiso blanco.

Quouro sian arriba, avèn leissa la veituro davans li bàrri, proche de dous càrri de "Viage Ourganisa" d'Alamand de Baviero.

Li carriero n'èron clafido d'aquéli gènt dóu parla ruscos e à l'acoutraduro tradiciounalo. Me sounjave que tout aquéu bèu mounde, devié faire lou bonur di coumerçant de la viloto. Mai, aleva d'acò, sus lou trepadou, à coustat de la boutigo d'un coutelié, i'avié dous brave vièi que fasien la charradio en lengo nostro. Un, asseta d'escambarloun sus uno cadiero, renous coumo uno pouso-raco e soun coulègo que se tenié dre davans éu, lou coufin di prouvisiou à la man.

— N'avèn pas proun vist, quand i'avié la guerro, d'aquéli salouparié! remièutavo lou renaire.

...?Prouvènço!... Buletin n° 53 - 100 an aquest an!



— Vo! mai acò 's fini, venié l'autre, fau óublida! aro vènon en touristo! coume ié vas!.  
— Iéu de touristo coum' acò, n'en vole ges, an que de resta dins sis oustau! ié vas tu, te perména en Alemagno? N'avèn talamen pati nautre en quatorge! e, en quaranta alor que raubavon lou pan de la bouco de nòstis enfant!

Subran, me venguè l'idèio folo de lou boustiga 'n pau, e davans l'estalage de la boutigo, emé quatre mot d'alemand que cuneissiéu :

— Schoen! prima! das schals françosich schoen.

Lou segne-grand avié pita l'aludo.

— Tè! regardo-lou aquéu d'aqui, emé sa tèsto de bochou!

Iéu, tourna-mai :

— Ia! gùtt schoen!!

Ma femo souto-voues :

— Lou fagues plus encagna!

Iéu, n'en poudiéu plus! E, coume ma maire e ma neboudo èron restado entanterin de l'autre coustat de la carriero, me siué entourna subran, e, à n-auto-voues e de segur en prouvençau :

— Oh! Man! Alor coume fasèn? Venès o venès pas? perqué nautre vous esperan pèr ici!..."

De souspresso, lou paure vièi, enca 'n pau se garçavo lou quiéu au sòu. Nautre sian lèu-lèu intra encò dóu boutigié, pèr rire coume d'asclo.

Quouro sian mai vengu deforo, di dous coumpaire, restavo lou regagnous, me venguè en francès

— Vous m'avez bien eu quand même!

— Papet! avès pas vist un cop, moun gàubi prouvençau!?

**Leoun Félix 1987**

## Zibo-zoubo

L'aubeto se levavo sout' un cèu bos de rose.  
Li colo prenien d'èr de damisello au champ,  
En ficheu de linoun, gounello de tartan,  
Courselet de velout coumun boutoun de roso.

Sus un tapis sedous semena de jounquiho  
Dansavon d'escoundoun fado 'mé fouletoun.  
D'escaragòu gigant pourtavon dóu catoun,  
Dins de canestelet pausa sus si couquiho.

Lis aubre respiravon la sesoun radiouso,  
Si bourroun se durbien en courolo d'argènt.  
Uno ninfo di bos de si det diligènt,  
Talavo 'no pimpo dins de fueio de l'èuse.

Li ganto, lis ibis fasien la sarabando,  
A ran dóu lau frounsi pèr li darrié reissoun.  
Un gau de brusc-mascle 'n jougant dóu bassoun,  
Oufrié sa court d'amour i poulo de la lando.

**Gineto Fiore-Florens**

Prix du Crédit Agricole

- - - -

## Negre... coume lou tablèu

*L'oubradou di Jaussemin  
M'a endraia lou bon camin  
Pèr apprendre poulidamen  
Lou prouvençau tóuti ensèn*

Un bèu jour, mi gènt m'anouncièron la grando nouvello:  
– Aro, me diguèron, que manges dins ti sièis an, es lou bon tèms pèr ana à la grando escolo e acò tre la rintrado.  
Ère countènt, ah! pamens anère apprendre à legi e escriéure. Un monde nouvèu anavo se durbi davans iéu, un mounde ounte anave acampa lou Saupre.  
Mi sorre qu'avien mai de tèms que iéu, me secavon de-longo lou fege emé de recoumandacioun de touto meno :

## ...?Prouvènço!... Buletin n° 53 - 100 an aquest an!

– Saras ounèste, escutaras bèn tout ço que dira lou mèstre d'escolo, siegues bèn óubeïssènt, pièi veiras quouro te faudra ana au tablèu negre....

Assadoula d'aquéli sansogno, ère ferra de quatre pèd pèr afrounta la proumiero dificulta, se se pòu dire, de la vido vidant.

L'escolo primàri, pensas un pau! ère tant carga de croio despièi que mi gènt me faguèron assaupre aquelo grando nouvello!.

Ah ! pamens lou grand jour es arriba.

Pièi, emé lou tèms, la magò d'aquéu tablèu negre fasié efèt cade matin à la coumençanço de la classo. Esperave que lou mèstre d'escolo prenguèsse lou bastounet de craio, e escriguèsse la dato en aut e dessouto la leiçoun de mouralo. Li letro, li mot que s'entieravon à mesuro, superbamen caligrafia me congoustavon que noun sai. Cade cop qu'aquéli letro, aquéli mot s'iscrivien sus lou tablèu negre, acò èro pèr ieu un encantamen.

Ai encaro lou remembre de quauquis-uno d'aquéli leiçoun de mouralo :

– Amo ço qu'es verai, amire ço qu'es bèu.

– Pèr gagna sa vido e s'endrudi, lou meiour biais acò 's de travaia.

– L'aigo-ardènt déurié s'apela l'aigo de mort; oustau de choucatoun, oustau de desoulacioun.

– La moudestiò rènd amable e couralo, atraio l'amista en fourviant d'escalustra e d'umilia lou prouchan.

– La Patriò merito neste respèt, nostro recouneissènci e neste amour.

– Masca uno fauto pèr uno messorgo, acò 's ramplaça uno taco pèr un trau.

– L'ourguei grato l'amo coume l'enflour dóu carage.

Cadun de nautre devien legi aquéli pensado prefoundo, pièi lou mèstre li coumentavo, em' acò pièi soulamen la proumiero leiçoun dóu jour poudié coumença.

E malur lou que sabié pas si leiçoun o qu'èro indiciplina! car la sentènci èro marrido e li castigamen èron bèn souvènt doulourous. Li cop de règlo sus li det o bèn ageinouia sus uno règlo o tambèn sus de pese se dins un cantoun de la classo, li bacèu, l'auriho tirado emai desegur, lou famous bouret d'ase.



Aquéli punicioun umelianto me fuguèron espagnado estènt qu'acò faguèsse déjà proun de tèms que fuguèron aboulido. Mai i'avié encaro de soubro, e ieu coume ère un escoulan nourmau e noun sobre-douta, ai-las!, reçaupère mai que d'un cop de picamen de règlo sus li det, emai de tirado d'auriho. Mai, crese bèn que s'aguisse agu degu couifa lou bouret d'ase, estaca pèr uno blouco souto lou mentoun, e me metre en asard de risado dis àutris escoulan dins la recreacioun, acò jamai de la vido l'aurièu agu pouscu lou supourta aquelo escorno, oh! boudiéu quete desounour!... A-n-aquelo epoco erian pas mescla li chato e li drole. Acò qu'es

## ...?Prouvènço!... Buletin n° 53 - 100 an aquest an!

de segur (toujour au dire de mi sorre), éli tambèn èron tratado parié, e se n'avien d'aquéli chato que charravon ferme, e bè tè! aqui avien dre à la lengo de bièu en cartoun pintado de rouge, pendoulado darrié lis esquino...

Mai tòuti aquéli punicioun, de segur, proun souvènt lou mèstre d'escolo lou repepiavo, quand acò èro pèr noste bèn e que maugrat-tout erian tòuti ama. Pèr provo souvènt èro escricho aquelo leiçoun de mouralo:

— Li remoustranço que te fasèn, moun pichot, soun li vertadiéri marco d'afecioun qu'avèn pèr tu...

Coume n'en douta, estènt qu'èro escri au Tablèu Negre...

**Gibert Mancini**

Grasso, lou 24 de Sètembre 1998

- - -

## Zezeto e Bartoumiéu

Zezeto e soun ome Bartoumiéu fan li preparadis de partènço: van passa si counget paga en ribo de la mar à Palavas.

En courdelant si basket, Bartoumiéu, que tibo trop fort, fai peta la courdelo.

Lou malurous es aqui que se demando coume faire pèr de dire d'estaca sa caussaduro, quouro devisto sus la taulo quicon que sèmbla uno meno de feisselo.

Se dis qu'aco farié l'afaire, l'aganto e se n'en servis pèr courdela lou basket.

De soun coustat, Zezeto varao de pertout, ié manco quicon, cerco, furno dins tòuti li recantoun. E zóu! cerco que cercaras.

Piei dis à soun ome:

— Acò 's lou pus fort. Creses que noun, m'ère paga un d'aquéli nouvèu maiot de ban mouderne coume se fan aro, que lou miéu que cargave lis àutris estiéu, avié passa de modo.

Cresiéu qu'èro aqui sus la taulo e lou vese pas pus. Digo, Bartoumiéu, l'auriés pas vist, tus, moun pichot trestring, coume dison.

Lou paure Bartoumiéu sentis que se vai faire espóussa li nieiro coume se dèu. Dis pas-rèn e descourdelo lèu-lèu lou basket.



**Louis d'Andecy**

Abriéu 2001